



Cuverta dal DVD «Grischun – il film».



Viaduct circular da la Viafier retica sper Brusio en la Val Puschlav.

FOTOS MAD

## Grischun – il film

Purtret visual d'in chantun multifar

■ L'onn 2005 ha la Chanzlia chantunala laschà realisar in film davart il Grischun. Quest purtret visual preschenta geografia e natira, dat in sguard sin il sistem politic, sin usits e cultura e tematischescha aspects

**economics e turistics. El exista en tschintg linguas: tudestg, rumantsch, talian, fran-**

**zos ed englais. Il film da radund 17 minutas pon ins guardar online sut [www.gr.ch](http://www.gr.ch), telechargiar sin l'agen computer u empustar sin DVD. La preschentaion dad oz porta ina versiun levamain scursanida dal text dal film, ch'è medemamain accessibel online.**

### Geografia

Il Grischun sa chatta en il center da l'Europa. Il Grischun, quai è natira pura: 615 lais, passa 900 pizs e 150 vals. En l'Engiadina ed en la Val Müstair sa chatta in reservat natiral unic, il parc naziunal svizzer.

Il Grischun è il sparta-aus da l'Europa. Sin passa 2000 meters sur mar sa chatta il lai da Tuma, la funtauna dal Rain. Giu da questas muntognas cula l'aua en tut las mars da l'Europa. L'aua muventa la Svizra, perquai che 12% da

l'electricitad da la Svizra deriva dal Grischun.

Il Grischun è in chantun dals passagis e da las transiziuns, linguisticamain, ma er geograficamain. Il Puschlav cuntanschan ins cun il tren direct il pli plaun dal mund, cun la viafier dal Bernina. Ella ans maina avertamain sur las Alps. En las trais valladas dal sid dal chantun vegn discurrì talian. Sin ils territoris da Soglio e da San Vittore prospereschon maieustus guauds da chastagners. Daspera vegn cultivà vin e puma.

In terz da tut la surfatscha dal chantun è cuvrada da guaud. Quatter da diesch personas vivan sin in'atezza da 1000 meters sur mar. La vischnanca la pli auta è Avras. La fracziun Juf sa chatta sin passa 2100 meters. Il Grischun è il chantun il pli grond da la Svizra cun la spessezza da la populaziun la pli pitschna.

### Il sistem politic

Il suveran da la Svizra è il pievel. La Svizra è ina democrazia directa sin plaun communal, chantunale e naziunal. Il sistem giuridic garantesch a mintgina ed a mintgin vasts dretgs persunals sco er politics.

Il Grischun tutga dapi l'onn 1803 tar la Confederaziun. La chapitala chantunala è Cuira, la citad la pli veglia da la Svizra.

La legislativa dal chantun Grischun è il Cussegl grond. Mintga circul ha almain ina deputada u in deputà. La direenziun è chausa da la presidenta u dal president

dal Cussegl grond. Ella u el vegn elegi mintga onn da nov. Sco unic parlament chantunale enconuscha il Cussegl grond dal Grischun trais linguas da tractativa. Mintga commembra u mintga commember è liber da tscherner la lingua en la quala ella u el vul s'exprimer.

L'executiva è la regenza che consista da tschintg commembras e commembers. Ella vegn elegida per ina perioda d'uffizi da quatter onns. Mintga cussegliera guvernativa è scheffa respectivamain mintga cusseglier guvernativ è schef d'in departament. Il presidi mida mintga onn.

Las derschadras ed ils derschaders da la dretgira chantunala e da la dretgira administrativa vegnan elegids dal Cussegl grond. Dretgiras districtualas e dretgiras circuntalas cumpletteschan la giurisdicziun.

Bleras carrieras politics cumenzan sin plaun communal. Qua vegnan discutadas las incumbensas actualas. E sch'i vegn alura votà a la radunanza communal u a l'urna ha la democrazia directa puspè mussà ch'ella è anc en vita.

### Turissem ed economia

Il Grischun viva dal turissem. Il clima muntagnard saun e las bleras funtaunas mineralas han promovì in turissem da bogn e da cura il 19avel tschientaner. Dapi lura è sa sviluppada ina hotellaria ed ina gastronomia multifara. Occurrenzas culturalas e pussaivladads da far sport cumpletteschan la vasta purschida.

Las bleras auas mineralas differentas portan oz il num dal Grischun or en tut il mund. L'aua da las muntognas fa dentant er che la Svizra sa muventa. En la Val di Lei sa chatta, circumdà da muntognas fantasticas, in dals pli gronds lais da serra dal chantun.

Aua e crap, accompagnads d'odurs e da suns. Or da quest concept è sa sviluppada in'oasa da recreaziun a Val S. Pieder.

La pura ed il pur dal Grischun èn umans polyvalents e conscients da l'ambient. La gronda part da las puras e dals purs cultivescha ils bains tenor criteris ecologics. I tiran nursas, chauras, chavals, arments bovins, gea schizunt lamas scuntran ins sin las purarias. Bleras puras e blers purs vendan lur products directamain a la clientella.

En il Signuradi, nua ch'il favugn stgaida l'aria e scurrenta ils nivels vegn cultivà vin. Ultra da numerusas spezialitads crescha qua oravant tut il Pinot noir. En il sid dal Grischun dominescha il Merlot.

Il Grischun è er attractiv per motivs economics. Ina grevezza fiscala moderata, personal ch'è scolà fitg bain, ina gronda productivitat da lavur ed ina buna infrastruttura porschan avantatgs dal lieu – gist a manaschis pitschens e mesauns.

La maioritad da las impiegadas e dals impiegads lavura oz en il sectur terziar, pia en il sectur da servetsch. Malgrà las bleras valladas è il provediment en il chantun Grischun garantì. Ina gronda rait da negozis da vischnanca, da bancas e da scolas surtira l'entir chantun.

### Tradiziuns e cultura

Il Grischun signifitgescha ina multifariadad culturala. Il Grischun è l'unic chantun triling da la Svizra. Ultra da tudestg e da talian vegn discurrì rumantsch unicomain en il chantun Grischun.

Scolars tiran schibettas che ardan en la val e cloman latiers il num da la preferida. La primavaira sa fa valair. Cun fiu u cun scalinim vegn stgatschà l'enviern. En il Grischun èn sa mantegnids usits pajauns veglianders. Lur senn è sa midà, la fascinaziun è dentant restada.

Il Grischun ha adina puspè carmalà ed ispirà grondas personalitads: il pictur ed artist talian Giovanni Segantini, Ernst Ludwig Kirchner, Friedrich Nietzsche, Alberto Giacometti u Alois Carigiet. Els han vivì e lavurà en la quietezza da quest mund alpin unic. Er Johanna Spyri è sa laschada ispirar a Maiavilla per ses bestseller da renum mundial «Heidi».

L'architettura grischuna è variada ed ha ina ritga tradiziun. La claustra da Müstair fa ozendi part dal patrimoni mundial da la Unesco. A Ziràn quintan 153

tavlas da lain eveniments da la vita da Cristus. Bleras ruinas, chastels e turs datan perditga d'ina istorgia muventada dal Grischun, en la quala la controlla da las muntognas e dals pass era stada la premisa indispensabla per stabilir la pussanza ed il commerzi. La vischnanca da Guarda cun ses maletg dal vitg unic ha ozendi ina muntada naziunala.

L'istorgia da damaun è la creaziun dad oz. Architectas, architects, artistas ed artists contemporans mussan ch'il Grischun n'ha betg anc pers sia inspiraziun. La vita culturala è multifara, il public er.

### Traffic

Colliar vul dir en il Grischun dad ir lungas vias per pudair surmuntar curtas distanzas, saja quai per rivar d'ina vart da la val a l'otra u saja quai per superar ina muntogna u per traversar ella. Il Grischun è il pajais dals tunnels e da las punts. Il Grischun è dentant er in pajais da transit.

Gia ditg è vegnida transportada rauba e marganzia sin las sendas da sauma sur las Alps. Ils Romans han costruì las emprimas vias. En connex cun la construcziun d'ovras electricas èn vegnidas avertas bleras vals laterales. Actualmain cumpiglia la rait da vias dal chantun Grischun passa 1600 kilometers.

Il Grischun è il pajais da la Viafier retica. La fin dal 19avel tschientaner è vegnida fundada – sin iniziativa da l'Ollandais Willem-Jan Holsboer – l'emprima viafier a binari stretg. Ils decennis vegnents è vegnida costruìda ina rait da viafier ch'è unica ozendi. L'onn 1999, cun l'avertura dal tunnel dal Vereina, ha la Viafier retica per entant serrà l'ultima largia e scursani la colliaziun per viafier da l'Engiadina bassa cun il rest da la Svizra.

Vitgs perifers vegnan ozendi colliads cun la rait da la Viafier retica tras curs regulars da l'auto da posta. E tgi che vul ir anc pli amunt profita d'ina da las purschidas da las passa 50 interpresas da teleferica.

Saja quai cun plattas da crap, cun lain u cun betun d'atschal, l'uman ha adina savì far vias tras quest mund alpin fascinante. El ha er savì al urbanisar ed al mantegnair en sia diversitad.

### La preschentaion:

Chanzlia chantunala. Grischun – il film. Cuira 2005.

### Ulteriuras infurmaziuns:

[chatta.ch/?hiid=152](http://chatta.ch/?hiid=152)  
[www.chatta.ch](http://www.chatta.ch)



Chasa da Gualsers en la Val d'Avras.